

Soek jy die Here of net sy seëninge?

Wat soek jy in jou godsdiens? Waarom dien en aanbid jy die Here? Soek jy *HOM* met jou hele hart? Of soek jy sy seëninge net ter wille van jou eie voordeel?

Die Here toon in Hosea 7 aan dat sy volk *HOM* nie gesoek het nie. Hulle het net sy seëninge gesoek. Ondanks sy liefde vir hulle, het Hy geen plek in hulle lewens ingeneem nie. Maar toe hulle in die nood was, het hulle Hom om hulp geroep. Is dit nie ironies nie? Hulle wou niks van Hom weet nie. Maar toe daar nie koring en wyn was nie, het hulle weer op Hom teruggeval.

Die Here is egter nie jou laaste uitweg nie. Nee, Hy moet die begin wees in jou lewe, want jou lewe begin by Hom. Hy het jou gemaak en jou ook gekoop met die kosbare bloed van sy eie Seun. Daarom lê Hy deur sy Gees beslag op jou hele lewe. Hy moet dus die beginpunt van jou lewe wees.

Dit is ook wat ons Here Jesus gesê het "*Beywer julle allereers vir die koninkryk van God en vir die wil van God, dan sal Hy julle ook al hierdie dinge gee*" (Matt 6:33). Dit beteken: Begin by God. Erken Hom as die Koning oor jou hele lewe. In alles wat jy beplan en aanpak, vra jy eers na sy wil. Soek *HOM* met jou hele hart en jou hele lewe.

Hy waarborg dat Hy sy beloftes sal na kom. Sy seëninge sal nie uitbly nie.

Sing Psalm 9:1 en 9

Ds. C. Krüger (Nelspruit)